

**Date – 07/12/2025**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. **Agriculture Minister Pu PC Vanlalruata chuan ram danga dan lova lei tha thawnchhuah thin titawp turin nasa taka hma an lak thu a sawi.**
2. **Nimina Pune-a 2025-2026 Syed Mushtaq Ali Trophy (Plate Group) final khelhah Mizoram chuan Sikkim hnehin an champion.**
3. **Prime Minister Narendra Modia chuan India chu ram thang chak leh thil man sang inflation hniamna ram entawn turah a insiam a ti**
4. **Sawrkar laipui chuan thlawhna zin turte ticket refund tikhawtlai loa pe let vat turin Indigo hotute a hriattir**

<><><>

**AGRI MINISTER**

**Agriculture Minister Pu PC Vanlalruata chuan ram danga dan lova lei tha thawnchhuah thin titawp turin nasa taka hma an lak thu a sawi.**

**Nimina Ch. Saprawng Truck Terminal Rangvamual atanga loneitute hman tur lei tha phurtu lirthei a vailiamnaah he thu hi sawiin Minister chuan District hrang hranga Fertilizer Inspector, Police leh Magistrate-te nen tangkawpin heng dan lova leitha thawnchhuak thinte uluk taka vil reng an nih thu a sawi a. Kumin 2025 chhung hian leitha dan lova sumdawna atana hman tur Urea Bag 5,424 leh DAP bag 300 man a nih tawh thu a sawi a ni.**

**Minister chuan sawrkar laipui thuchhuah zawmin Mizoram chuan Agriculture Department kaltlangin thlai chinna ram zau zawng mil leh thlaichinna leilunga thlai chaw awm zat (Soil Fertility) milin sawrkar laipui report a pek thin thu a sawi a. Chutiang chuan kumtin sawrkar laipui atangin Mizoram chanvo fertilizer loneituten tlawm taka an lei theih tur a dawn thin thu a sawi a. Mizoram quota lei tha hi a chanvo neitu loneituten MRP ngeia an lei theih nan leh hnianghnar taka an hmuh theih nan sawrkar chuan theihtawp a chhuah thu a sawi a ni.**

<><><>

**NCC COMBINED ANNUAL TRAINING CAMP**

**NCC GP HQ Aizawl Group Commander Brigadier GS Arora chuan Mizoram sorkarin NCC Academy changtlung tak dinna turin ram a ruahman fel tawh tih a sawi.**

1 Mizo Air Squadron NCC-in kumtina a buatsaih thin, Combined Annual Training Camp (CATC-132) State Training Centre, Tanhril-a nimina a hawnaah he thu hi a sawi a. Group Commander chuan he Academy din tur hi NCC training na hmun changlung tak tur, tunlai thiamna hmanraw changkang ber bera thawm tur a nih thu a sawi a. Hei hi hmarchhak pum tana ‘centre of excellence’ tur, academy pawimawh tak a nih dawn thu a sawi a ni.

Group Commander chuan NCC chu a hminga pawl ding ve mai ni lovin khawvela thalai intelkhawm pawl lian ber a nih thu leh thalai tam tak nun kaihruaitu, ram hmangaihna thinlung pu tura thalaite rilru kaihruaitu pawimawh tak a nih thu a sawi a. NCC chu hnam hrang leh nunphung hrang hrang nei thalaite suiikhawmtu pawimawh tak a nih thu a sawi a. Tunhnaiah Mizoram sorkar leh North East Region NCC Directorate tangkawpin Mizorama NCC dinhmun tha zawka a thawm mek thu a sawi a ni.

VC Correspondent Nutei

Tun dinhmunah Mizoramin Army NCC Battalion pathum leh Air Force NCC Squadron pakhat a nei a, anni hian a huhovin kum tin cadet 8,000 vel an zirtir thin a ni.

<><><>

## CYMA LEADERS INSPECT ONGOING ROAD CONSTRUCTIONS

Central YMA hruaitute chuan nimin khan Hlimen leh Lungleng inkar PMGSY kawng leh Vairengte leh Sairang inkar kawng siam mek an enfiah.

Hlimen leh Lungleng inkar kawng siam enfiahnaah hian Central YMA President Pu R. Lalingheta hoin CEC member mi 14 an tel a. PMGSY hnuai helai kawng siam hnathawk mek tu Contractor te hian hna an thawk muang nia hriat a nih avangin Central YMA te hian an en a, Contractor te chu chak zawk a thawk turin an ngen a. Central YMA President chuan YMA chu thil tha duh, chak tak leh tha tak ni bawk si a thawh duh an nih thu sawiin chulai hmuna thawkte pawh Mizo tho an nih anga Mizoram tana theihtawp chhuah tura an duh thu a sawi a. Kawng enfiahnaah hian Samtlang, Lungleng North leh Lungleng-I Branch hruaituten an lo tawiawm a ni.

Vairengte leh Sairang inkar kawng enfiahnaah hian an Vice President, Prof Lalnuntluanga'n hovin Treasurer Er. H Duhkima leh Fin. Secy. Pu MS Ralte leh CEC mi 5 te an kal thung a. Vairengte atanga Sairang inkar hi NHIDCL hnuai contractor 3 in open tender-a chhangin kumin July thla atanga thawk tanin July 2026 a thawh zawh tur a nih thu CYMA hruaitute chuan an sawi a. Tun thleng hian Contractor-te hian an thawh tur ang zat ve pawh an la thawk lo vek ni a an hmuh thu an sawi a. Central YMA hruaitute chuan NHIDCL hotute leh Contractor te chu nakum fur ruah tui tlak hma ngeia an hna zo vek tura hrilhin, an vil zui zel tur thu an hrilh a ni.

Central YMA hruaituten thla hmasa ni 8-a an kal ai chuan hna pawh an lo thawk ve viau a an hriat thu an sawi a. Hei aia nasa lehzuala chaka hna thawk turin an contractor te hi an hrih a. Naktuk Thawhtanni atangin Sairang lam atanga hna thawk tan ve nghal turin Jain Infratech Co. hotute chu an hrih bawk a ni.

<><><>

## KMMTTP

Sorkar laipui hmalakna kal mek Kaladan Multi- Modal Transit Transport Project (KMMTTP) hmalakna kal mek a Mizoram leh Mizo mipuite a a nghawng awm thei tur thil hrang hrang te thli thlaiIn nimin khan Myanmar leh India inrina Zochachhuah leh Hmawngbuchhuah khua bakah a chheh vel khua te chu KMMTTP Impact Study Group Committee Chairman Pu.T. Lalhlimpaia chuan a tlawh.

Thudawn danin Act East Policy hnuaiia KMMTTP hmalakna kalpui mek hi sorkar laipui chuan Mizoram chung atanga chhim lam Mizoram tawp Zochachhuah thlengin kawngpui sial hna a thawk zo tawh a. Zochachhuah (Mizoram) atanga Myanmar ram chung lam Paletwa thlenga kawngpui sial tur he KMMTTP hmalakna hi tun dinhmunah hian kalpui mek zel a ni a, Sorkar laipui thuneitute chuan he lai hna thawh mek hi Kum 2027 ah chuan zofel turin an ruahman a ni.

## VC of Correspondent Nutei

Mizoram tawp Myanmar ramri Zochachhuah khua a cheng khawtlang hruaitute chuan KMMTTP avanga Bangladesh mi dan lova Mizorama lut an awm rihloh thu an sawi a. Myanmar atang erawhin raltlan in 40 vel an khuaah an awm tih an sawi a. KMMTTP avanga hmasawna hi Myanmar lam chu a teltuah an tang hmasa mek tih sawiin an mamawh hrang hrang Mizoram atangin an chawlut mek tih an sawi a. Mizoram lam chuan Myanmar lam atanga chawkluh an la nei meuh lo niin an sawi bawk.

MLA Pu T. Lalhlimpaia leh amah tawiawmtute hian Mizoram Chhim tawp thlenga Rel kawng sial tumna Hmawngbu chhuah khua pawh an tlawh nghal a ni.

<><><>

## DRUG SEIZED

Zirtawpni zan khan Kolasib Police duty te chuan Kolasib District chhung Bukvannei leh Buhchangphai chhehvelah ruihhlo enfiah runpui buatsaihin hnamdang pakhat Dilwor Hussein, Hailakandi District, Assam man a ni.

An mi man hi Buhchangphaia cheng niin a hnen atang hian Ruihhlo (Heroin No 4 ni a hriat), sahbawn bawm pa 7 a thun an man a, Ruihhlo hlut zawng hi tualchung rate ah chuan cheng nuai 16,71,000 man hu nia chhut ani.

Ruihhlo neitua puh Dilwor Hussein hi nimin khan Kolasib District Court ah hruai a nih hnu in Kolasib District Jail-ah dah luh nghal a ni.

<><><>

## MIZORAM TEAM WINS SYED MUSHTAQ ALI TROPHY (PLATE GROUP)

Nimina Pune-a 2025-2026 Syed Mushtaq Ali Trophy (Plate Group) final khelhah Mizoram chuan Sikkim hnehin an champion.

He inelna hi Board of Control for Cricket in India (BCCI) hnuai niin Twenty20 format a ni a. Mizoram awmna Plate Group hnuai hian Mizoram bakah team nga dang - Arunachal Pradesh, Manipur, Meghalaya, Nagaland leh Sikkim te an awm a. Mizoram team hian season tharah chuan Plate Group atangin Elite Group-ah an khel tawh dawn a ni.

Chief Minister Pu Lalduhoma chuan social media kaltralingin Mizoram team te an champion thei chu a lawmpui thu a sawi a, Mizoram infiamna chanchinah Mizoram chu bung thar an kai pui tih a sawi a. India ram infiamna ngiahhlut hlawh ber cricket huanga Mizoram team ten nasa taka hma an sawn chu lawmawm a tih thu sawiin Cricket Association of Mizoram leh Sports & Youth Services te hnathawh chu ropui a tih thu a sawi a ni.

Sports Minister Pu Lalnghinglova Hmar pawhin 2025-2026 Syed Mushtaq Ali Trophy (Plate Group)-a Mizoram an champion thei chi a lawmpui thu leh a chhuan takzet thu social media kaltralingin a tarlang bawk a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## PM

Prime Minister Narendra Modia chuan India chu ram thang chak leh thil man sang inflation hniamna ram entawn turah a insiam a ti. Nimina New Delhi-a inkhawm pakhatat he thu hi sawiin Pu Modia chuan ram sum dehchhuah GDP chu tun 2nd Quarter ah khan zaa 2 in a pung tih a sawi a. Hei hian kumina ram than chak zia a entir a ni a ti a. Khawvel huapa India dinhmun pawimawh zia sawiin Pu Modia chuan harsatna leh buainain khawvel a tihbuai mek laiin India chu amahin nghet takin a ding a ni a ti a. Eibar zawinna kawngah ram tamtakin hniam lam an pan laiin India chuan hmasawn zawngin a kal thung a ni a ti bawk.

<><><>

## Indigo

Sawrkar laipui chuan thlawhna zin turte ticket laklet te tikhawtlai loa pe let vat turin Indigo hotute a hriattir. Union Ministry of Civil Aviation chuan ticket cancel emaw thlawhna thlawh dana harsatna tawk zawng zawngte ticket man

an chawi pek let tur chu zanin dar 8 hmaa pe let ngei ngei turin thu a pe a. Kan correspondent sawidanin ramchhunga thlawhna service thahnem tak thulh anih avangin mi tam takin harsatna an tawk mek a ni.

<><><>

**EAM**

External Affairs Minister Dr.S,Jaishankar chuan India-in ramdang nena inlaichinna a siam danah ramdang tumahin thu an nei thiang lo a ti. Nimina New Delhi-a inkhawm buatsaihah he thu hi sawiin Pu Jaishankara chuan India chuan amah duhthlanna ngeiin ramdang nena inlaichianna politics ah thutlukna a siam thei a ti a. Russia President Vladimir Putina'n India lo tlawh avanga US leh India inlaichinna a chhiat phah tur anga sawi chu a hnawl bawk a ni.

<><><>